



COMUNU DE SOLÈMINIS

Provìntzia de sa Sardìnnia de bàsciu

Bia Crèsia 18, 09040 – Solèminis (SU – Sud Sardìnnia)
Còdixi Fiscali (CF) 80005100922 - Partida Iva (PI) 01430300929

Acontèssius e Sagra

(Informatzionis càpias ainturus de su giassu istituzionali de su Comunu de Solèminis:
Primu Pàgina > “Bivi Solèminis” > “Cultura e turismu”)

Su connotu sardu torrat a nou dònni annu gràtzias a unu calendàriu prenu prenu de manifestatzionis.

In totu s'Ìsola processionis, cuncertus, arregatas, spetàculus tiatralis e amostas-mercau faint biri cosas spantosas, allirghendi su coru e amainendi su visitadori, su spetadori, s'ascurtadori, e donendi-sì de fai cun propostas culturalis agradèssias de is unus e de is àturus.

Festa de Sant'Antoni de su Fogu – Su Dexeseti de Gennarxu

A merì sa stàtua de su Santu, apustis de dd'èssiri mudada cun is aràngius ingiriaus in su bastoni suu, dda portant in processioni e a sa torrada, sendi giai benidita, alluint unu fogaroni preparau de su comitau organizzadori.

In su mentris chi afestant, is aràngius beniditus, is mandarinus, su pani e su binu ddus spartzint cun is partecipantis.

Festa de sa Candelera – Su Duus de Friaxu

Sa Candelera arregordat sa presentatzioni de Gesus in su Tèmpiu.

In custa accurrèntzia, *'sa priora'*, una fèmina chi fait parti de sa Cunfraria de sa Madonna de su Rosàriu, scioberat duas pipieddas de sa bidde, *'is priorisseddas'*, chi s'assimbillant apari e bistias totunas po s'ocasioni.

'Sa priora' e *'is priorisseddas'*, in su mentris chi tzelebrant sa missa, portant in donu Gesus Bambinu e duas turturedas. In prus, benidixint is candelas e ddas oferrint a is fidelis.

Festa de Santu Sidoru – S'ùrtimu domìnicu de Maju o su primu domìnicu de Làmpadas

Sa festa, dedicada a su santu protettori de is massajus, cumentzat su sàbudu a merì candu su Santu benit portau in processioni de sa crèsia parrochiali a sa crèsia de sartu, passendi in is arrugas de sa bidde.

Sa stàtua de su Santu est acumpangiada de is cuaddus, cun is cavalieris bistius a còstumini sardu, de is grupus folcloristicus a còstumini e de 'is traccas', is carrus de sa traditzioni imperaus in is traballus de su sartu e mudaus po sa festa cun antigas ainas sardas.

A s'arribu de sa processioni a sa cresiedda, apustis de sa beniditzioni, de 'is traccas' ndi bogant aforas, anca ddus offerri a totus, su chi rendit su logu comenti a su pani, is durcis, s'olia, su binu e su muscau.

Su domìnicu a mengianu faint sa missa solenni in sa cresiedda de su matessi nòmini.

Su merì prima de sa torrada de su Santu a sa bidde, su comitau organizadori de sa festa offerit is prodotus de sa bidde comenti a sa petza de brebei buddia cun is birduras e sa brebei arrustia, sa fai buddia, s'olia, su casu, su binu e is durcis imbuddicaus de su comitau.

A mericeddu torrante a fai sa processioni de sa furriada e, lòmpius a sa bidde, faint unu piticu spetàculu de guetus.

Festa de Santu Jacu e de Sant'Anna – Su binticincu / bintises de Trèulas

Sa festa de importàntzia prus manna po is soleminesus est sa festa de Santu Jacu e de Sant'Anna, chi funt cunsideraus, totu e duus impari, is patronus de sa bidde.

Cumentzant a ddus afești cun sa processioni, de a mengianu, innanti de sa missa solenni in onori insoru, cun sa genti de su logu chi ddui aproillat e cun s'acumpangiamentu de sa banda musicali.

Su merì de su binticuàturu nci funt is festeggiamentus tzivilis e, comenti a sa traditzioni, s'alluint is fogus de artifitziu.

§ § §